

# Nopa Achtihui Amatlajcuiloli catli Juan Quiijcuilo

*Nopa camanali catli temaca nemilistli catli yan-cuic*

<sup>1</sup> Timechtlajcuilhuíaj tlen Jesucristo, yaya catli ipa itztoya ipejya nochí catli onca. Timechilhuise catli tijcactoque quema yaya techcamanalhui huan catli tiquitztoque ica toixteyol. Quena, tijt-lachilijtoque Jesucristo huan ticasique ica tomax. Yaya quitocaxtíaj nopa “camanali” catli temaca nemilistli. <sup>2</sup> Quema yaya hualajqui, technextili nopa nemilistli, huan tiquitaque. Huajca ama timechpohuilise tlen Jesucristo catli quipiya nemilistli para nochipa ipan ya para temacas. Achtihui yaya itztoya nepa ihuaya Totata huan teipa hualajqui nica campa tojuanti. <sup>3</sup> Huajca timechilhuise catli tiquitztoque huan catli tijcactoque para amojuanti huan tojuanti huelis tijpiyase paquelistli se ica seyoc ipan Toteco. Huan para nochí san sejco hueli timohuampoxchihuase ica Toteco Totata huan Icone Jesucristo. <sup>4</sup> Ama nimechtlajcuilhuíia ni tlamantli nica para san sejco ma tijpiyaca se hueyi paquelistli.

*Toteco yaya tlahuili*

<sup>5</sup> Huan ya ni nopa camanali catli Jesucristo tech-machti huan ya nopa timechilhuíaj ama. Toteco Dios yaya tlahuili, yaya senquistoc cuali. Amo onca tzintlayohuilotl o catli amo cuali ipan ya. <sup>6</sup> Sintla tiquijtohuaj timohuampoxchijtoque ica

Toteco Dios huan noja tinejnemij ipan tzintlayohuilotl, tiistlacatij huan amo tijchihuaj catli melahuac.<sup>7</sup> Pero sintla tinemij ipan tlahuili huan tijchihuaj catli cuali pampa Toteco catli itztoc tlahuili nemi tohuaya, huajca tijpiyase paquilibrium se ica seyoc, huan ieso Jesucristo, Icone Toteco, techyolpajpactinemis tlen nochi tlajtlacoli.

<sup>8</sup> Sintla tiquijtohuaj amo tijpiyaj tlajtlacoli, huajca timocajcayahuaj ica toseltzitzi huan amo tijnequij tiquijtose catli melahuac.

<sup>9</sup> Pero sintla tiquilhuise Toteco totlajtlacolhua catli tijchijtoque, huajca yaya temachtli huan quichihua san catli xitlahuac, huan techtlapojpolhuis totlajtlacolhua huan techyolpajpacas ica nochi catli amo cuali tijchijtoque. <sup>10</sup> Pero sintla tiquijtohuaj amo titlajtlacolchijtoque, huajca tijtocaxtiaj Toteco se istlacatiquetl huan amo tijpiyaj icamanal ipan toyolo pampa Toteco ya quijtojtoc tijpiyaj tlajtlacoli.

## 2

### *Cristo totlatempalehuijca*

<sup>1</sup> Noconeuhua catli nimechicnelia, nimechtla-jcuilhuia nochi ni tlamantli para amo xitlajtlacolchihuaca. Pero sintla se acajya tlajtlacolchihuas, tijpiyaj se totlatempalehuijca catli itztoc iixpa Toteco Totata. Totlatempalehuijca yaya Jesucristo catli quichihua san catli senquistoc cuali.

<sup>2</sup> Quema Jesucristo mijqui ipan cuamapeli, yaya elqui nopa tlacajcahualistli catli tlaxtlajqui por totlajtlacolhua. Huan amo mijqui san por tojuanti

totlajtlacolhua. Nojquiya mijqui por inintlajtlacolhua nochí masehualme ipan tlaltipactli.

<sup>3</sup> Huan tijmatij temachtli tiquiximati Jesucristo, sintla tijchihuaj catli Toteco technahuatía. <sup>4</sup> Pero sintla se quijtohua quiiximati Toteco huan amo quichihua catli Toteco technahuatía, yaya se istlacatiquetl huan amo quinequi quijtos catli melahuac. <sup>5</sup> Pero aqui quichihua catli icamanal quijtohua, quiicnelía Toteco ica se teicnelijcayotl catli senquistoc cuali. Huan sintla quej nopa titlaicnelíaj huan tijchihuaj catli technahuatía, huajca tijmatij tiitztoque ipan Toteco. <sup>6</sup> Huan sintla tiquijtohuaj tiitztoque san se ihuaya Jesucristo, monequi tinejnemise cuali quen yaya nejnenqui.

### *Se tlanahuatili catli yancuic*

<sup>7</sup> Noicnihua, ni catli nimechtlajcuilhuía amo ya se tlanahuatili catli yancuic. Ni tlanahuatili para ximoicnelica eltoc catli Toteco ipa amechnahuati hasta ipejya quema achtihui anquineltocaque Cristo. Huajca ya anquicactoque. <sup>8</sup> Pero eltoc quen nimechtlajcuilhuía ica se yancuic tlanahuatili. Huan nelía monexti ipan inemilis Cristo para quitoquili ni tlanahuatili quen nojquiya nesi para amojuanti anquitoquilijque. Huan yeca eltoc quen ama panotij tzintlayohuilotl campa hueli huan ya cahuani se tlahuili catli quinextía catli melahuac.

<sup>9</sup> Sintla se masehuali quijtohua nemí ipan tlahuili huan quichihua catli cuali, pero noja quicualancaita iicni ipan Cristo, huajca amo melahuac catli quijtohua. Pampa nopa masehuali noja nejnemi ipan tzintlayohuilotl

huan quichihua catli amo cuali. <sup>10</sup> Pero se catli quinicnelía sequinoc iicnihua ipan Cristo, nejnemi ipan tlahuili huan amo huetzis ipan tlajtlacoli. <sup>11</sup> Pero se catli quicualancaita seyoc iicni ipan Cristo, itztoc quen se catli nentinemi ipan tzintlayohuilotl, niyon amo quimati campa yohui pampa catli amo cuali quitzacuilitoc itlalnamiquilis.

<sup>12</sup> Nocone hua catli nimechicnelía, nimechtlajcuilhuía ni amatlajcuiloli pampa Toteco ya anmechtlapojpolhuijtoc amotlajtlacolhua por catli Jesucristo quichijqui.

<sup>13</sup> Amojuanti antetajme, nimechtlajcuilhuía ni amatlajcuiloli pampa ya anquiiximatij Jesucristo catli ipa itztoc tlen ipejya nochí catli onca.

Telpocame, nimechtlajcuilhuía ni amatlajcuiloli pampa ya anquitlantoque Amocuallacatl.

Nocone hua, nimechtlajcuilhuijtoc pampa anquiiximatij Toteco Totata.

<sup>14</sup> Tetajme, nimechtlajcuilhuijtoc pampa ya anquiiximajtoque yaya catli ipa itztoc hasta quema ipejya nochí catli onca.

Telpocame, nimechtlajcuilhuijtoc pampa ante-tique.

Icamanal Toteco mocahua ipan amoyolo huan ya anquitlantoque Amocuallacatl.

<sup>15</sup> Ayacmo xiquicnelica catli masehualme ipan ni tlaltipactli quiicnelíaj, niyon amo xiquicnelica nopa tlamatli catli eltoc ipan ni tlaltipactli. Sintla se masehuali quiicnelía tlamatli tlen ni tlaltipactli, huajca amo neli quiicnelía Toteco Totata.

<sup>16</sup> Pampa nochí tlamatli catli onca ipan ni tlaltipactli technotza ma tijchihuaca san catli totlajtlacolchijca nacayo quinequi quichihuas. Techyoltilana ma tijnequica timoaxcatise nochí catli tiquitaj, huan techchihua ma timohueyimatica ica catli tijpiyaj ipan tonemilis nica. Pero ni tlamatli amo huala tlen Toteco Dios, ya ni huala tlen masehualme ipan ni tlaltipactli catli amo quiicnelíaj Toteco. <sup>17</sup> Pero panoti ni tlaltipactli huan nochí catli itztoque ipani, huan nochí nopa tlamatli catli inijuanti quinequij. Pero aquí quichihua catli Toteco quinequi, itztos para nochipa.

*Nopa catli melahuac huan catli amo neli*

<sup>18</sup> Nocone hua catli nimechicnelía, ya tiitztoque ipan tlayacapan tonali. Huan ya anquicactoque para hualas yaya catli quitocaxtíaj Icualancaitaca Cristo, huan ama nelía ya monextijtoque miyac icualancaitacahua. Huan ya nopa techmachiltía para ya monechcahuía nopa tlayacapan tonali ipan ni tlaltipactli. <sup>19</sup> Ni masehualme catli quicualancaitaj Jesucristo quisque tlen tojuanti catli tijneltocaj, pero nelía amo quema quineltoque quen tojuanti. Sintla itztosquíaj tohuaya ipan Cristo, huajca mocajtosquíaj tohuaya, pero quisque para ma nesi nochí catli mosentilíaj tohuaya amo san se ica tojuanti.

<sup>20</sup> Pero amojuanti, amo anitztoque quen inijuanti, pampa Toteco anmechmacatoc Itonal huan anquimatiј nochí catli melahuac. <sup>21</sup> Huajca amo nimechtajcuilhuía ya ni pampa amo anquimatiј catli melahuac. Nimechtajcuilhuía

pampa anquimatij, huan amo onca niyon se istlacaticayotl ipan catli melahuac.

<sup>22</sup> Nochi tojuanti tijmatij ajqueya istlacati. Istlacatij catli quiijtohuaj Jesús amo ya inon Cristo catli Toteco techilhui techtitlanilisquia. Catli quej nopa quiijtohuaj nelía icualancaitacahua Cristo huan amo quiiximati Toteco Dios, niyon amo quiiximati Icone. <sup>23</sup> Sintla se masehuali quiijtohua amo quiiximati Icone Toteco, huajca nojquiya amo quiiximati iTata. Pero sintla se acayja tlayolmelahua para quineltoca para Jesucristo nelía itztoc Icone Toteco, huajca inon masehuali nojquiya quiiximati Toteco Dios.

<sup>24</sup> Huajca xijcahuilica ma mocahua ipan amoyolo nopa camanali catli anquicactoque hasta quema achtihuiya anquineltocaque Cristo. Huan sintla nopa camanali mocahua ipan amoyolo, anmocahuase ihuaya Icone Toteco huan nojquiya ihuaya Toteco Totata. <sup>25</sup> Huan ya ni catli Jesucristo techtencahuilijtoc; techilhuijtoc techmacas nemilistli yancuic catli amo quema tlamis.

<sup>26</sup> Nimechtlajcuilhuijtoc pampa nijnequi xijmatica para nemij masehualme catli quinequij amechcajcajahuase. <sup>27</sup> Pero Toteco amechmacatoc amojuanti Itonal, huan Itonal mocahua ipan amoyolo huan amo monequi seyoc amechmachtis pampa Itonal Toteco iseltzi amechmachtia noch i tlamatli. Huan catli yaya amechmachtia ya nopa nelía melahuac. Amo se istlacaticayotl. Huan monequi xijchihuaca quen yaya amechmachtijtoc, huan ximocahuaca amotlatzquilijtoque ipan Jesucristo.

<sup>28</sup> Huajca ama nocone hua, ximocahuaca anmotlatzquilijtoque ipan Cristo para huelis anquipiyase temachili huan amo anpinahuase quema yaya hualas. <sup>29</sup> Anquimati j Jesucristo yaya senquistoc cuali, huan nochí catli quichijtinemij catli cuali itztoque iconehua.

### 3

#### *Icone hua Toteco*

<sup>1</sup> Ximomacaca cuenta quesqui techicnelía Toteco Totata pampa technotztoc tiicone hua. Huan yeca miyac amo cuajcualme amo techiximatij pampa amo quiiximatque ya.

<sup>2</sup> Huajca noicnihua catli nimechicnelía, ama ya tiitztoque tiicone hua Toteco, huan ayamo technextilijtoc quenicitza tiitztose teipa. Pero tijmatij quema Jesucristo sempa hualas, tielise quen yaya pampa tiquitase quenicitza yaya itzto. <sup>3</sup> Huan nochí tojuanti catli timochiyaj para tielise quen Jesucristo timo iyocacahuaj tlen catli amo cuali ama, para ma tiitztoca senquistoc cuali quen Cristo itzto senquistoc cuali.

<sup>4</sup> Quema se masehuali tlajtlacolchihua, quiixpano se itlanahuatil Toteco, pampa tlajtlacoli eli quema se quiixpano se tlanahuatili. <sup>5</sup> Huan anquimati j Cristo hualajqui ipan tlaltipactli para techquixtilis totlajtlacolhua, huan yaya amo quipixqui niyon se tlajtlacoli. <sup>6</sup> Huajca amo aqui catli mocahua tlatzquitoc ipan Jesucristo noja tlajtlacolchijtinemi. Masehualme catli tlajtlacolchijtinemij amo quimachilíaj ajqueya Jesucristo huan amo quiiximatij. <sup>7</sup> Nocone hua catli nimechicnelía, amo aqui ma anmechcaj cayahua

ica ya ni. Se masehuali catli quichijtinemi catli xitlahuac, yaya itztoc xitlahuac quen Cristo itztoc xitlahuac. <sup>8</sup> Pero se masehuali catli tlajtla-colchijtinemi, yaya iaxca Amocualtlacatl, pampa Amocualtlacatl tlajtlacolchijtinentoc hasta ipejya. Huajca yeca hualajqui Icone Toteco ipan ni tlaltipactli para quisosolos itequi Amocualtlacatl.

<sup>9</sup> Aqui tlacajtoc ipan Toteco huan Toteco quichijtoc icone amo tlajtlacolchijtinemi, pampa iixcopinca iTata, yaya Toteco Dios, mocahua ipan ya. Huan amo hueli noja tlajtlacolchijtinemis pampa yaya icone Toteco. <sup>10</sup> Huajca huelis tiquinitase ajqueyame iconehua Toteco huan ajqueyame iconehua Amocualtlacatl. Yaya catli amo quichihua catli cuali huan amo quinicnelía iicnihua ipan Cristo, yaya amo iaxca Toteco.

### *Ximoicnelica se ica seyoc*

<sup>11</sup> Huan ya ni nopa camanali catli anquicac-toque hasta quema achtihui anquineltocaque Cristo: monequi timoicnelise se ica seyoc.

<sup>12</sup> Ma amo tijchihuaca quen Caín catli eltoya iaxca Amocualtlacatl huan quimicti iicni, Abel. Huan ¿para tlen quimicti iicni? Caín quimicti pampa quichihuayaya catli fiero huan iicni quichihuayaya catli xitlahuac. <sup>13</sup> Huajca noicnihua, amo tleno ximoilhuica sintla amo cuajcualme ipan ni tlaltipactli anmechcualancaitaj.

<sup>14</sup> Tojuanti tiquinicnelíaj toicnihua, huan yeca tijmatij ya tipanquisque ipan toojhui tlen achtihui campa nochí mictoque. Ama tinemij ipan seyoc ojtli campa tijpiyaj nemilistli catli yancuic.

Yaya catli amo quiicnelía iicni ipan Cristo noja mictoc iixpa Toteco. <sup>15</sup> Aquí quicualancaita iicni ipan Cristo itztoc quen se temictijquetl. Huan anquimatiј se temictijquetl amo quipiya nemilistli catli yancuic para nochipa ipan ya. <sup>16</sup> Tijmatij catli quichihua se catli nelía quiicnelía seyoc, pampa Cristo motemactili huan mijqui por tojuanti. Huan huajca tojuanti nojquiya, monequi timotemactilise por toicnihua. <sup>17</sup> Pero sintla titlapijpiya miyac ipan ni tlaltipactli, huan tiquitas se moicni catli quipolohua itechmonequi, huan san timoyoltetilis huan amo tijpalehuis, huajca amo hueli tiquijtos tiquicnelía moicni. <sup>18</sup> Noconeňua catli nimechicnelía, ma amo san tiquijtose tiquinicnelíaj toicnihua, pero monequi ma tijnextica para melahuac tiquinicnelíaj ica catli cuali tiquinchihuilíaj.

### *Hueli timotemacaj iixpa Toteco*

<sup>19</sup> Sintla tiquinicnelíaj sequinoc huan tiquinpalehuíaj, tijnextíaj para melahuac tiaxcahua Toteco. Huan quej nopa hueli tijpiyase temachili ipan toyolo quema timoquetzaj iixpa Toteco, <sup>20</sup> masque toyolo quemantic techtelhuía para amo tijchijtoque senquistoc nochí catli tihuertosquíaj. Pero nopa catli Toteco quijtohua tlen tojuanti ipati más tlen nopa catli toyolo techilhuía, pampa yaya quimati nochí catli onca. Huan quimati titeicnelíaj huan titepalehuijtoque. <sup>21</sup> Huan noicnihua catli nimechicnelía, sintla toyolo amo techtelhuía, huajca quena, noja más hueli tijpiyase temachili quema tijnechcahuía Toteco. <sup>22</sup> Huan Toteco

techmacas nochí catli tijtlajtlanise pampa tiquinneltocaj itlanahuatilhua huan tijchihuaj nopa tlamantli catli quipactía. <sup>23</sup> Huan ya ni itlanahuatil: Monequi ma tijneltocaca itoca [3:23 O itequiticayo.] Icone, Jesucristo. Huan monequi ma timoicnelica se ica seyoc quen technahuatijtoc. <sup>24</sup> Masehualme catli quichihuaj catli Toteco technahuatía mocahua tlatzquitoque ipan Toteco huan Toteco itztoc ipan injuanti. Huan tijmatij Toteco mocahua ipan tojuanti pampa tijpiyaj Itonal catli yaya techmacatoc.

## 4

### *Ajqueya quipiya Itonal Toteco huan ajqueya amo quipiya*

<sup>1</sup> Noicnihua catli nimechicnelía. Amo xiquinneltocaca nochí masehualme san pampa quijjtohuaj quipiyaj Itonal Toteco huan yaya quinmacatoc inintlamachtil. Monequi xiquinyejeccoca catli quijjtohuaj ica Icamanal Toteco para anquittase sintla melahuac nopa tonaltzi catli quipiyaj huala tlen Toteco, o amo. Pampa miyac tlacajcayahuani nemij campa hueli, huan quijjtohuaj para itlajtol pannextijcahua Toteco, pero san istlacatij. <sup>2</sup> Nimechilhuis quenicatza anquimatisce catlique quipiyá Itonal Toteco huan catlique amo. Nochi masehualme catli quijjtohuaj para Jesús yaya inon Cristo catli Toteco techilhui techtitlanilisquía ica itlacayo tlen masehuali, huajca injuanti quipiyaj Itonal Toteco. <sup>3</sup> Huan nochí masehualme catli quijjtohuaj Jesús amo yaya Cristo catli mocuepqui masehuali, amo neli quipiyaj

Itonal Toteco. Nopa masehualme amo hualahuij tlen Toteco. Inijuanti quipiyaj se iajacayo Icualancaitaca Cristo catli ya anquicactoque ajsis ipan tlaltipactli huan nelia ya ajsico.

<sup>4</sup> Noconebla catli nimechicnelia, amojuanti aniaxcahua Toteco huan ya anquitlantoque nopa tlahuilancayotl ica nopa istlacatica tlajtol pannextiani pampa Itonal Toteco catli mocahua ipan amojuanti quipiya mas chicahualistli que Amocuallacatl catli itztoc ipan masehualme catli iaxcahua ni tlaltipactli. <sup>5</sup> Nopa istlacatica tlajtol pannextiani itztoque iaxcahua ni tlaltipactli. Huajca inijuanti camanaltij quen amo cuajcualme tlen ni tlaltipactli, huan amo cuajcualme tlen ni tlaltipactli quintlacaquilaj. <sup>6</sup> Pero tojuanti tiaxcahua Toteco, huan nochli catli quiiximati Toteco Dios quitlacaquilaj catli tiquijtohuaj. Pero inijuanti catli amo iaxcahua Toteco, amo quinequij techtlacaquilise. Huajca quej nopa huelis tijmatise ajqueya quipiya Itonal Toteco catli melahuac, huan ajqueya quinpiya ajacame catli istlacatij.

### *Toteco yaya tlaicnelijcayotl*

<sup>7</sup> Nohuampoyohua catli nimechicnelia, ma timoicnelijtinemica se ica seyoc pampa tlaicnelijcayotl huala tlen Toteco. Huan nochli catli nelia teicneliaj, inijuanti iconehua Toteco huan quiiximati Toteco. <sup>8</sup> Aqui amo teicnelia amo quiiximati Toteco, pampa Toteco, yaya tlaicnelijcayotl. <sup>9</sup> Toteco technextili hasta canque techicnelia pampa techtitlanili Icone iyojtzli para ma

huala ipan ni tlaltipactli para ma tijpiyaca nemilistli yancuic por ya. <sup>10</sup> Ya ni technextilijtoc se teicnelijcayotl catli melahuac. Amo tojuanti tiquicnelijque Toteco huan yeca Cristo hualajqui. Elqui Toteco Dios techicneli huan yeca techtitlanili Icone para yaya elis nopa tlacajcahualistli catli tlaxtluahuas por totlajtlacolhua.

<sup>11</sup> Nohuampoyohua catli nimechicnelía, sintla Toteco techicnelijtoc quej nopa, huajca monequi ma timoicnelica. <sup>12</sup> Niyon se masehuali amo quema quiitztoc Toteco Dios, pero sintla timoicnelíaj, huajca Toteco mocahuas ipan tojuanti huan mojmostla itlaicnelijcayo monextis ipan tojuanti ica catli cuali tijchihuaj. <sup>13</sup> Tijmatij para melahuac timocahuaj ipan Toteco huan yaya mocahua ipan tojuanti pampa yaya techmacatoc Itonal. <sup>14</sup> Huan tiquitztoque Icone Toteco huan timechyolmelahuaj para melahuac Toteco Dios quititlanqui Icone para ma elis inintemaqueixtija nochí catli itztoque ipan ni tlaltipactli. <sup>15</sup> Huan yaya catli quineltoca huan quinyolmelahua masehualme para Jesús nelía Icone Toteco, Toteco mocahua ipan ya huan ya mocahua ipan Toteco.

<sup>16</sup> Tojuanti ya tiquitztoque quen Toteco techicnelía huan ipan iteicnelijcayo tojuanti timotemachijtoque. Toteco yaya tlaicnelijcayotl. Huan aqui mojmostla teicnelía mocahua motlatzquilijtoc ipan Toteco huan Toteco mocahua ipan ya. <sup>17</sup> Huan quema timocahuaj timotlatzquilijtoque ipan Toteco, nopa tlaicnelijcayotl quipyia itlajca para tojuanti pampa techmacas temachili iixpa ipan nopa

tonal quema Toteco techtequitlachilis. Tijpiyase nopa temachili nopa tonal pampa ipan tlaltipactli tiitztoyaj quen Jesús. <sup>18</sup> Amo monequi tiquimacasise yaya catli tlahuel techicnelía, pampa itlaicnelilis quitlamiltía nochí majmajtli. Sintla tojuanti timajmahuij, tiquimacasij se tlatzacuiltyli huan ya nopa quinextía para ayamo senquistoc cuali moscaltijtoc iteicnelilis Toteco ipan tojuanti.

<sup>19</sup> Tojuanti tiquicnelíaj Toteco, pampa yaya achtilui techicneli. <sup>20</sup> Sintla se masehuali quiijtohua: “Niquicnelía Toteco”, pero yaya quicualancaita se iicni, huajca yaya se istlacatiquetl. Pampa aqui amo quiicnelía se iicni catli quiitztoc, amo huelis quiicnelis Toteco catli amo quiitztoc. <sup>21</sup> Huan Toteco techmacatoc ni tlanaahuatili: Yaya catli nelía quiicnelía Toteco, monequi nojquiya ma quinicneli iicnihua.

## 5

### *Ya tijtlanque catli amo cuali ipan ni tlaltipactli*

<sup>1</sup> Nochi catli quineltocaj para Jesús itztoc inon Cristo catli Toteco techihui techtitlanilisquia, injuanti itztoque iconehua Toteco. Huan nochi catli quiicnelíaj Toteco Dios, nojquiya quinicneliáj nopa sequinoc catli Toteco quinchijtoc iconehua. <sup>2</sup> Huan tijmatij tiquinicnelíaj iconehua Toteco quema tiquicnelíaj Toteco huan tijtoquilíaj catli yaya technahuatijtoc. <sup>3</sup> Huajca para tiquicnelíaj Toteco quinequi quiijtos tiquintoquilíaj itlanahuatilhua, huan itlanahuatilhua amo ohui. <sup>4</sup> Huan nochi iconehua Toteco quitlanij catli amo cuali ipan ni tlaltipactli quema motemachíaj

ipan Toteco para quinpalehuis ma tlatlanica.  
<sup>5</sup> ¿Ajqueyame nopa masehualme catli quitlanij catli amo cuali ipan ni tlaltipactli? Quitlanij inijuanti catli quineltocaj para Jesús itztoc Icone Toteco.

*Catli Itonal Toteco quijtohua tlen Cristo*

<sup>6</sup> Huan nesqui para Jesucristo eltoc nelía Icone Toteco quema mocuaalti huan quema quitojajqui ieso huan mijqui. Jesucristo amo san mocuaalti, pero mocuaalti, huan quitojajqui ieso huan mijqui. Huan Itonal Toteco nojquiya teyolmelahua para ya ni catli melahuac. <sup>7</sup> Pampa itztoque eyi catli teyolmelahuaj catli melahuac nepa ilhuicac. Itztoc Toteco Totata, itztoc Icone catli itoca nopa “camanali” pampa tenextilía Totata, huan itztoc Itonal Toteco. Huan ni eyi elij san setzi. <sup>8</sup> Huan onca eyi tlamantli ipan ni tlaltipactli catli techilhuía para melahuac Jesucristo yaya icon Toteco. Achtihui Itonal Toteco techilhuía ipan toyolo para melahuac. Ica ompa tijcajque quema Toteco Dios tlayolmelajqui para yaya Icone quema Jesús mocuaalti, huan ica expa nojquiya tlanemijya nesqui para itztoya Icone quema quitojajqui ieso huan mijqui. Huan nochí ni eyi tlamantli san se technextilía para Jesucristo yaya Icone Toteco. <sup>9</sup> Sintla se masehuali teyolmelahua catli nelía quiitztoc, tijneltocaj icamanal. Huajca monequi achi más tijneltocase sintla yaya Toteco Dios iseltzi catli teyolmelahua para nelía se tlamantli. Huan Toteco techyolmelajtoc ajqueyaa Icone. <sup>10</sup> Huan aqui quineltoca Icone Toteco quimati ipan iyolo para melahuac catli quineltoca pampa nopena Toteco quiyolmelajtoc ajqueyaa icon. Huan nopa

masehualme catli amo quineltocaj catli Toteco quiijto tlen Icone, quitocaxtiaj Toteco se istlaca-tiquetl, pampa amo quineltocaj catli quiijto para ajqueya Icone. <sup>11</sup> Huan ya ni catli Toteco techy-olmelahua: Toteco techmacatoc nemilistli catli yancuic huan ni nemilistli catli yancuic eltoc ipan Icone Jesucristo. <sup>12</sup> Yaya catli quipiya Icone Toteco ipan iyolo quipiya nemilistli catli yancuic, pero catli amo quipiya Icone, amo quipiya nopa nemilistli.

### *Juan quinnahuatijtejqui*

<sup>13</sup> Nimechtlajcuilhuía amojuanti catli anquinel-tocaj itoca Icone Toteco. Nijnequi xijmatica temachtli ya anquipyaj nemilistli yancuic catli amo quema tlamis, huan para más xijneltocaca ipan ya.

<sup>14</sup> Huan tijmatij temachtli sintla tijtlajtlaníaj Toteco catli quinamiqui ica catli yaya quinequi, yaya techtlacaquilía. <sup>15</sup> Huan sintla tijmatij para temachtli techtlacaquilía nochí catli tijtlajtlaníaj, tijmatij temachtli yaya techmacas nopa catli tijtlajtlanijtoque.

<sup>16</sup> Sintla acajya quiita iicni ipan Cristo tlajtla-colchihua, pero amo se tlajtlacoli catli nima qui-hualicas nopa tlatzacuiltili para ma miqui, huajca ximotlatlajtica para ya huan Toteco quimacas nemilistli, sintla amo tlajtlacolchijtoc para monequi miquis. Se masehuali huelis quichihua tlajtlacoli catli quihualica miquilistli, huan amo nimechil-huía para xijtlajtlanica Toteco por aqui quichihua quej nopa. <sup>17</sup> Nochi catli amo cuali eltoc tlajtlacoli,

pero onca tlajtlacoli ica catli se amo miquis por catli quichijtoc.

<sup>18</sup> Tijmatij iconehua Toteco amo tlajtlacolchijtinemij pampa Icone Toteco quinmocuitlahuía para nopa Amocualtlacatl ma amo huelis quintzquis ica imax.

<sup>19</sup> Tojuanti tijmatij temachtli tiiconehua Toteco huan nochí sequinoc masehualme campa hueli ipan tlaltipactli mocahuaj ipan ichicahualis Amocualtlacatl.

<sup>20</sup> Huan tijmatij temachtli hualajtoc Icone Toteco huan techmacatoc tlamachiltli para huelis tiquiximatisse Toteco yaya catli melahuac Dios. Huan tiitztoque san se ica ya catli melahuac, pampa tiitztoque ipan Icone, Jesucristo. Yaya temachtli Toteco huan yaya catli temaca nemilistli catli yancuic. <sup>21</sup> Noconeuhua catli nimechicnelía, ximotlachilica para amo xiquintlepanitaca tlaixcopincayome o tlamatli catli masehualme quichijtoque ica ininmax huan quinitaj para Dios. Quej nopa ma eli.

**Icamanal toteco; Santa Bíblia  
Bible without Deuterocanon in Nahuatl, Huasteca  
Occidental (MX:nhw:Nahuatl, Huasteca Occidental)**

copyright © 2005 Wycliffe Bible Translators, Inc.

Language: Nahuatl, Huasteca Occidental

Translation by: Wycliffe Bible Translators, Inc.

Náhuatl, Huasteca Occidental [nhw], Mexico

**Copyright Information**

© 2005, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The Bible without Deuterocanon**

in Nahuatl, Huasteca Occidental

**© 2005, Wycliffe Bible Translators, Inc.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 11 Nov 2022 from source files  
dated 29 Jan 2022  
0d0cfbfa-2c44-59e4-b00b-2ef5eb44b02d